



*Apparition de Iesus à Marie Magdelaine en forme  
d'un Iardinier.*

**M**ARIE Magdelaine, qui s'estoit tenuë continuellement près le sepulchre, se baissa dedans, & y ayant veu deux Anges assis vestus de vestemens reluisans, l'un d'iceux au chef, & l'autre aux pieds du sepulchre où auoit esté mis le Corps de Iesus: les Anges donc dirent à Marie, Pourquoi plores-tu femme? elle leur dit, Pource qu'on a emporté mon Seigneur, & ne sçay où on l'a mis; mais quand elle eut dit cela, elle se retourna en arriere, & vid Iesus qui luy dit, Femme, pourquoi plores-tu? qui cherches-tu? elle qui pensoit que ce fust vn Iardinier, luy dit, Seigneur, si tu l'as emporté, où l'as-tu mis, & ie l'osteray. Iesus luy dit, Marie? Elle s'estant retournée, luy dit, *Rabboni*, c'est à dire, Maistre, & Iesus luy dist, Ne me touche point, car ie ne suis point monté à mon Pere; mais va-t'en à mes freres, & leur dis, que ie monte à mon Pere, & à vostre Pere; ie monte à mon Dieu, & à vostre Dieu. Adonc Marie Magdelaine vint annonçant aux Disciples qu'elle auoit veu le Seigneur, & qu'il luy auoit dit ces choses.

*S. Marc Chap. 16. S. Iean Chap. 20.*